

Сәәнәр хөөдән хургълулав

„Победа“ гидг колхозд би хөөч болдж 1956-ч джилин декабрь сарас авн кӧдлджәнәв. Алдр Октябрьск социалистическ революцин 40-ч өөн-иг диилвртә кӧдлмшәр тосхар, бийән әрвлл уга зүткдж йовнав. Эн үвләс торгън нооста 745 хӧ нег чигн гару угагъар, сән чинәтәгъар гаргъув.

Апрель сарин 15-с авн хӧд хургълджана. Эн кӧдлмшиг сәәнәр кехин төләд, цаглань хот-хоолин өгч, өдртән 300 грамм концентрированн хот өгчәнәв. 100 хөөнәс 115 хургъ авх болдж би үган өгчәнәв. Тер гарсн хургъдиг үкл угагъар, намр күртл экә-

снь йилгъдж автл асрдж хәләх болн хӧн болгънас 6 килограмм цевр сәәхн торгън ноос киргъдж авнав.

Ода би хөөдән сән ногъата идгәр хәрүлдв, хөөдиг киргътл ноосинь киртәл уга хәләдж, асрдж йовнав.

Шунмгъа сәәнәр, күцәм-джтәгъәр кӧдлсн учрар, 1957-ч джилин апрель сарин 6-д Элст балгъснд болсн селәнә эдл-ахун өмн нүүрт йовгч улсин хургт би орлцув. Орн-нутгтан улм икәр торгън ноос болн мал өгхин төләд би чидлән әрвлл уга кӧдлнәв.

Ах хөөч АДУЧИН Эрднь.